



*Comme Iesus est pris au iardin des Oliues, & liuré traistreuſement
aux Iuifs par Iudas.*

LES V S ayant réueillé ſes Diſciples, enfin leur diſt ; Leuez-vous & priez, afin que n'entriez en tentation ; voicy l'heure eſt prochaine, que le fils de l'Homme ſ'en va eſtre liuré és mains des méchans : Leuez-vous, voicy celuy qui me liure approche. Adonc Iudas accompagné d'vne bande de ſoldats & officiers des Sacrificateurs Phariſiens, vint avec fallots, lanternes & armes lequel auoit baillé le ſignal, diſant : Celuy que ie baiſeray, c'eſt-il, prenez-le, & le menez ſeulement. Adonc Ieſus qui ſçauoit toutes les choſes qui deuoient aduenir, ſ'auança, & leur diſt ; Qui cherchez-vous ? & eux répondans, Ieſus Nazarien, il leur diſt, C'eſt moy ; alors ils tomberent à la renuerſe. Et Iudas alloit deuant eux, & diſt à Ieſus en le baiſant, Dieu te gard Maïſtre. Et Ieſus luy diſt, Amy, pourquoy es-tu venu liurer le fils de l'Homme par vn baiſer ? Adonc les gens-d'armes ſ'approcherent & le faiſirent ; & ceux qui eſtoient avec luy dirent, Seigneur frapperons-nous ? & Pierre frappa vn des ſeruiteurs du Sacrificateur nommé Malchus, & luy coupa l'oreille dextre : mais Ieſus luy remit en diſant à Pierre, Remets ton glaiue, ne veu tu point que ie boiue le Calice que mon Pere m'a ordonné ? ſi ie voulois prier mon Pere, il me baileroit plus de douze legions d'Angeſ.

S. Matthien Chap. 26. S. Marc Chap. 14. S. Luc Chap. 22. S. Iean Chap. 18.